



Gewalt doheem
**De Bléck op
d'Kanner**



LE GOUVERNEMENT
DU GRAND-DUCHÉ DE LUXEMBOURG
Ministère de l'Égalité entre
les femmes et les hommes



ŒUVRE
Nationale de Secours
Grande-Duchesse Charlotte

Dës Broschür ass mat der wäertvoller Ënnerstëtzung vun der Œuvre Nationale de Secours Grande-Duchesse Charlotte an dem Ministère fir Gläichstellung tëschent Fraen a Männer ausgeschafft ginn.

E besonnesche Merci fir déi generéis Ënnerstëtzung.

Léif Lieser, léif Lieserinnen,

Dës Broschür riicht sech un Elteren an all aner Persounen am Kontakt mat Kanner a Jugendlechen.

Op de folgende Säite gëtt beschriwwen, wéi Kanner Gewalt an hirem Doheem erliewen, wéi si dës empfangen a wéi si méiglecherweis drop reagéieren. Et gëtt ernimmt wéi eng Konsequenzen haislech Gewalt fir Kanner kann hun, a wéi si am beschte geschützt an ënnerstëtzt ginn. Zum Schluss fannt Dir eng Rei Adresse vun Ulafstellen, déi professionell Hëllef ubidden.

Dës Broschür huet net den Usproch komplett ze sinn, an ersetzt keng Berodung oder Therapie. D'Broschür huet als Zil, iwwer eng wichteg Realitéit fir Kanner, déi Affer vun haislecher Gewalt sinn, opzeklären an Hëllef unzebidden.



PRO FAMILIA
fondation

ALTERNATIVES

Centre de consultation pour enfants
et adolescents victimes de violence

Virwuert – Fondation Pro Familia

Gewalt an der Famill verursaacht vill Leed fir d’Affer, deenen hiert kierperlecht, psychesch an/oder sozialt Wuelbefannen kuerzzeiteg oder souguer dauerhaft beanträchtegt kann gi. Onofhängeg dovun ob Kanner direkt Affer an/oder Zeien vun Gewalt téschent hiren Elteren sinn, liewen si ganz oft an enger Situatioun vun permanenter Angscht an fillen sech verantwortlech fir dat wat geschitt. Ausserdeem besteet d’Gefor, dass si déi gewalttätig Modeller vun hiren Elteren iwwerhuelen. Sou Erfahrungen féieren zu schwéieren Traumata bei den Kanner an kennen zu eeschthaften Schwieeregkeeten um emotionalen a kognitiven Niveau wéi och am Verhalen féieren.

Am Kader vun enger ëmfaassender Approche fir d’Ënnerstëtzung vun den Familien geréiert d’Fondation Pro Familia verschidde Servicer, dorënner den Service ALTERNATIVES, deen dësen Projet an d’Liewen geruff huet. Dësen Service bitt psychologesch an psychotherapeutesch Hëllef fir Kanner a Jugendlecher un, déi mat Gewalt an hirer Famill konfrontéiert sinn. Zanter 2018 engagéiert sech den Service och als Service d’assistance fir mannerjäreg Affer vu Gewalt am Kader vum Gesetz zur haislecher Gewalt. D’Zil ass et „Alternativen“ zur Gewalt ze fannen a familiär Bezéiungen opzebauen, déi sech duerch géigesäitegen Respekt auszeechnen.

Fir den Kanner bei der Veraarbechtung vun hiren traumateschen Erlebnisser ze hëllefen a fir d’Elteren an der Entwécklung vun Alternativen zu Gewalt ze ënnerstëtzen, huet den Service ALTERNATIVES zwou Broschüren erstellt, déi sech u betreffen Kanner a Familien rüchten. Dëst psycho-pedagogesch Material soll déi Professionell an der Begleedung vun de Kanner an hiren Elteren ënnerstëtzen.

E besonnesche Merci géllt der ganzer Equipe vun ALTERNATIVES fir d’Erstellung vun dësen Broschüren, déi fir professionell Interventiounen ganz wäertvoll sinn.

Doriwwer eraus géllt e grouse Merci der CŒuvre Nationale de Secours Grande-Duchesse Charlotte an dem Ministère fir Gläichstellung téschent Fraen a Männer fir d’Finanzéierung vun dësem Projet.

All Situatioun ass anescht an verdéngt et an hirer ganzer Komplexitéit berécksichtegt ze gin, mee den Prozess vun der Gewalt gétt an der Reegel net ouni Hëllef vun baussen gestoppt. Ech hoffen, dass dëst Instrument dozou bäidroen wäert eng qualitativ héichwäerteg Begleedung vun Kanner an hiren Elteren, déi mat haislecher Gewalt konfrontéiert sinn, ze assuréieren.



Pierrette Meisch

Directrice vun der Fondation Pro Familia

Virwuert – Ministère fir Gläichstellung tëschent Fraen a Männer

Kanner si léif an unhänglech, Kanner sinn haart an wëll, Kanner si frëndlech an fuerdernd, virun allem awer si Kanner eis Zukunft. Mir sollen si an hirer Entwécklung ënnerstëtzen, bei hiren Projet'en begleeden an si zu wertschätzenden Mënschen erzéien... dofir brauch et keng Gewalt.

Gewalt ass, wann eng Persoun seng Stärkt, seng Positioun, seng Muecht oder seng Wieder notzt, fir engem absichtlech wéizendoen oder ze bestrofen. Gewalt géint Kanner ass en absolutten NO-GO: si verletzt, si deet wéi an si zerstéiert.

Obwuel et zu Lëtzebuerg gesetlech verbueden ass Kanner ze schloen an si kierperlech, psychesch, verbal oder sexuell ze mëssbrauchen, ass Gewalt géint Kanner an Jugendlecher bei eis eng traureg Realitéit. Si kennt an allen vertruedenen Kulturen an an allen gesellschaftlechen Schichten zu Lëtzebuerg vir.

Fir vill Kanner ass hirt Doheem eng Platz wou se Angscht hunn, wou si amplaz Léift an Gebuergenheet Gewalt erliewen. Dat kann a well ech net akzeptéieren, et ass eis gemeinsam Pflicht Kanner ze schützen an hinnen en gewaltfräit Liewen ze erméiglechen. Nëmme e Liewen ouni Gewalt, erlaabt de Kanner sech z'entfalten, hirt Potenzial auszeschöpfen an e glécklecht Liewen opzebauen - si dobäi ze ënnerstëtzen ass mir e perséinlecht Uleies.

Mir dierfen haislech Gewalt géint Kanner net als Privat- oder Familljenugeleegenheet akzeptéieren, mee mir mussen dës gesamtgesellschaftlech Laascht zesummen an all Dag bekämpfen, well Kanner sinn ëmmer Affere egal ob si direkt oder indirekt betraff sinn.

Well mir Gewalt net verhënneren kennen, mussen mir preventiv agéieren, informéieren an déi betraffe Kanner opfänken fir se beim Opschaffen vun hiren Erfarungen ze ënnerstëtzen an hinnen nei Perspektiven ze weisen.

D'Fondation Pro Familia an d'Equipe vun ALTERNATIVES zielen an dëser Missioun zu mengen wichtigsten Partner, well si an Zesummenaarbecht mat de betraffene Kanner an hiren Elteren Bewältigungsstrategien ausschaffen an hinnen e Wee an eng Zukunft ouni Gewalt weisen.



Dofir en härerlechen Merci an vill Kraaft fir dës esou wichtig Aufgab.

Mat léiwe Gréiss,

Taina Boffering

Ministesch fir Gläichstellung tëschent Fraen a Männer

Virwuert – Œuvre Nationale de Secours Grande-Duchesse Charlotte

Haislech Gewalt ass eng Laascht, déi eis ganz Gesellschaft betrëfft. Et ass eng permanent, awer oft verstoppte Realitéit, well d'Mësshandlungen an der Intimitéit vun der Famill stattfannen.

Haislech Gewalt verursaacht bei de betroffene Kanner, onofhängeg dovun ob se direkt Affer oder Zeien sinn, e grousst Leiden, dat laangfristeg Konsequenze mat sech bréngt. Angscht, Schimmt, Roserei, Trauregkeet, Schold – onkontrolléierbar an oft widderspréichlech Emotiounen iwwerschwemmen déi betraffe Kanner. Sie mengen, dass si mat hirem Schicksal aleng sinn an traue sech nëmme seelen, sech engem unzevertrauen an no Hëllef ze froen.

D'Œuvre Nationale de Secours Grande-Duchesse Charlotte ass sensibel fir déi Noutlag, an där sech déi Kanner befannen, déi vun haislecher Gewalt betraff sinn an huet net gezéckt, d'Fondation Pro Familia bei der Ausaarbechtung vu Sensibiliséierungsbrochüren fir Kanner, hier Elteren a Professionneller ronderëm dës Familien ze ënnerstëtzen.

Andeems een oppen iwwer haislech Gewalt schwätzt, d'Fachpersonal an d'Familien iwwert d'Leide vun den Kanner informéiert a se op hier Bedierfnisser opmierksam mécht, awer och andeems een den Kanner erkläert, dass hier Reaktiounen an Emotiounen normal sinn, dass si mat hirer Situatioun net aleng sinn an dass si Ënnerstëtzung an Trouscht kënnen kréien, brécht een den Tabu an hëllt dat Phänomen aus dem Schied eraus.

De Kampf géint haislech Gewalt ass eng kollektiv Pflicht.

Loosst eis zesummen handelen!



Simone Flammang

Member vum Verwaltungsrat vun der Œuvre Nationale de Secours Grande-Duchesse Charlotte
Präsidentin vum Comité Jeunes

Inhaltsverzeechnis

Just e Sträit? Oder wou fänkt Gewalt un?	7
Wat ass haislech Gewalt?	7
Wéi weist sech haislech Gewalt?	9
De Bléck op d’Kanner	10
„Eng op den Hënner huet nach kengem geschuet!“...oder?	11
Reaktiounen vun de Kanner op d’Gewalt	12
Wat brauch all Kand fir sech gesond ze entwéckelen?	17
Wat hëlleft de Kanner?	18
Adresse fir Hëllef	22
Quellerverzeechnis	23

Just e Sträit? Oder wou fänkt Gewalt un?

Et ass normal ënnerschiddlecher Meenung ze sinn, an an all Bezéiung gëtt et munchmol Sträit. Zum fairen Ëmgang matenee gehéiert, datt all Partei seng Meenung soen dierf, sech géigesäiteg nolauschert, an zesummen no Léisunge sicht. Wa Sträit net op Aenhéicht stattfënnt an dem enge säi Wuert méi zielt wéi dem anere säint, gëtt Kontroll ausgeübt. Dës Dominanz féiert zu séilesche Verletzungen, zu deenen heefeg nach kierperlech Verletzungen dobäikommen.



Wat ass haislech Gewalt?


Haislech Gewalt (op Franséisch *violence domestique*) si Gewaltdoten an -droungen, déi tëschent Mënsche stattfannen, déi zesumme liewen.

Dorënner fält Gewalt:

- › an der Koppel
- › während oder no enger Trennung oder Scheedung
- › géint Kanner
- › vu Kanner géint hir Elteren
- › tëschent Geschwëster
- › tëschent anere Leit, déi zesumme wunnen



Haislech Gewalt riskéiert sech ze steigern an ze widerhuelen.



D'Gesetz zu Lëtzebuerg verbitt all Forme vun haislecher Gewalt.



§ Nom Gesetz vun der haislecher Gewalt (*loi du 8 septembre 2003 sur la violence domestique*²) besteet d'Méiglechkeet vun enger Mesure d'expulsion. Wa Gewalt ausgeübt oder ugedrot gëtt, kann d'Police geruff ginn a vum Parquet eng Mesure d'expulsion vum presuméierten Täter vun doheem decidéiert ginn. Déi Persoun dierf 14 Deeg net méi heemgoen an dierf kee Kontakt mat dem oder den Affer hunn. Dës Mesure kann op Ufro vum Affer fir weider 3 Méint verlängert ginn.

¹Fachstelle für Gleichstellung Stadt Zürich (2010). *Häusliche Gewalt erkennen und richtig reagieren* (2. überarbeitete und erweiterte Auflage). Verlag Hans Huber: Bern.

²<http://data.legilux.public.lu/eli/etat/leg/loi/2003/09/08/n1/jo>

Wéi weist sech haislech Gewalt?

Psychesch Gewalt

- › stänneg kritiséieren
- › erfirmaachen, mat anere Wieder soen: „Du kanns näischt an du bass näischt wäert“, „Jiddereen hätt et besser gemaach wéis du“, „Du méchs alles falsch!“
- › beleidegen
- › aschüchteren
- › jäizen
- › ënner Drock setzen, bedroen
- › beschëllegen: „Du hues mech provoziert“
- › d'Meenung net zouloossen
- › d'Gefiller net eescht huelen oder ofwäerten : „Du iwwerdreifs“, „Du bass hypersensibel“
- › stalken

Kierperlech Gewalt

- › schloen
- › stoussen
- › mam Fouss rennen
- › festhalen
- › mam Messer oder engem aneren Objet verletzen
- › en neigebuerend Kand rëselen

Sexuel Gewalt

- › sexuelle Mëssbrauch
- › ënner Drock setze fir sexuell Handlungen
- › géint de Wëllen upaken
- › pornografescht Material weisen oder produzéieren

Ekonomesch Gewalt

- › Bankkonten, Bankkaarten an Ausgabe kontrolléieren
- › verbidden, schaffen ze goen
- › finanziell ofhängeg maachen
- › Suen a Besëtz ewechhuelen

Sozial Gewalt

- › Bezéiungen zu Frënn ënnerbannen
- › vun der Famill isoléieren
- › den Handy a Kontakter kontrolléieren
- › aspären

Vernoléissegung


- › Mangel un Opmierksamkeit a Kommunikatioun
- › Mangel un Narung a Schlof
- › keng ugepasste medezinesch Versuergung
- › d'Kand sech selwer iwwerloossen
- › keng emotional Zouwendung

Dëst si Beispiller vun haislecher Gewalt, si weist sech awer och nach anescht. Déi ënnerschiddlech Forme vu Gewalt ginn eenzel oder zesummen ausgeübt.

De Bléck op d'Kanner

Gewalt doheem betrëfft déi ganz Famill. Kanner gesinn oder héiere Gewalt tëschent Familljememberen a spieren eng ugespaante Stëmmung. Si erliewen d'Gewalt, och wann dës net direkt géint si geriicht ass. Zousätzlech besteet d'Gefor, datt si kierperlech verletzt ginn, wa si agräifen, fir zum Beispill een Erwuessenen ze schützen oder d'Gewalt ze stoppen.

Gewalt fënnt net nëmmen tëschent Erwuessene statt, mee riicht sech och direkt géint Kanner. D'Gewalt géint Kanner geet meeschtens vu Persounen aus, déi de Kanner nostinn a fir hire Schutz verantwortlech sinn (Elteren, Grousselteren, Erzéier/-innen oder aner Besuchspersounen).



Haislech Gewalt huet en Afloss op de Kanner hiert Wuelbefannen a schuet hinnen. Si leiden dorënner an dofir ass et wichteg, datt d'Gewalt ophält.

D'Kanner hunn e Recht op eng gewaltfräi Erzéiung an e gewaltfräit Ëmfeld.

„D'Kanner hunn d'Recht, datt keen hinne kierperlech oder séilesch wéideet.“

Art. 19 vun der Kannerrechtskonventioun vun de Vereenten Natiounen (1989)³

³<http://ork.lu/index.php/fr/>

„Eng op den Hënner huet nach kengem geschuet!“ ...oder?

„Eng op den Hënner ginn“ ass kierperlech Gewalt, an all Form vu Gewalt ass schiedlech a strofbar. Och wann nach heefeg ugeholl gëtt, Kanner als erzéieresch Moosnam kierperlech ze bestrofe wier an der Rei, ass dem Gesetz no zu Lëtzebuerg kierperlech a séilesch Gewalt géint Kanner verbueden.

Fir eng gesond Entwécklung vum Kand ass et wichteg, datt d'Elteren hiert Erzéiungsverhalen iwwerdenken an änneren. Kierperlech Strofe mussen duerch alternativ Erzéiungsmethoden ouni kierperlech Iwwerleeënheet ersat gi. D'Kanner brauchen e gewaltfräien Ëmgang mat hire Matmënschen.



Reaktiounen vun de Kanner op d'Gewalt

Haislech Gewalt betrëfft d'Kanner a wierkt sech op hir Gefiller, Gedanken, Kierperreaktiounen an hiert Verhalen aus.

Gefiller

A Situatiounen vun haislecher Gewalt empfangen d'Kanner ënnerschiddlech Gefiller:

- › Angscht ëm hir eege Sécherheet, déi vun hiren Elteren an hire Geschwëster.
- › Roserei, datt een Elterendeel sech net ënner Kontroll huet oder datt si net geschützt ginn.
- › Trauregkeet doriwwer, datt si selwer an/ oder Persounen, déi hinnen no stinn, Affen vu Gewalt sinn.
- › Si fülle sech schëlleg. D'Kanner ginn dovun aus, hiert Verhalen wier den Ausléiser fir d'Gewalt.
- › Hëlleflosegkeet a Muechtlosegkeet: Si hu keen Afloss op d'Gewalt a kenne se net stoppen. Si si kierperlech ënnerleeën.
- › Veronsécherung: Si verstinn net wat geschitt. Si fülle sech net gutt opgehuewen an hirem Doheem a verléieren d'Vetrauen an hir Besuchspersounen.
- › Si schumme sech. Si mengen dat géing just hinne geschéien. Si fülle sech aleng.

Dës Gefiller trieden zu ënnerschiddlechen Zäitpunkte mol méi a mol manner staark bei de Kanner op, déi vun haislecher Gewalt betrëfft sinn. D'Kanner léieren am Laf vun hirer Entwécklung duerch de Kontakt mat aneren Kanner oder Erwuessener eréischt, wéi ee mat den ënnerschiddleche Gefiller ëmgoe kann.

Riicht sech d'Gewalt vun enger Besuchspersoun, där d'Kand nosteet, géint d'Kand selwer, fillt d'Kand sech hëlleflos. D'Kand ass vun der Persoun, vun där d'Gewalt ausgeet, ofhängeg, huet se gär a sicht Léift a Gebuergegenheet. Gläichzäiteg fillt d'Kand sech net sécher, ass verletzt an huet Angscht. Dofir fällt et dem Kand an dëser Situatioun besonnesch schwéier, no Hëllef ze froen.

Gedanken

D'Kanner denken iwwer d'Gewalt no a stellen sech Froen. Si sichen no Léisungen a wënsche sech, datt sech eppes ännert.

- › „Ech verstinn net, wat geschitt ass.“
- › „Et ass meng Schold.“



- › „Ech muss hëllef, eng Léisung ze fannen. Wat kann ech maachen, fir ze hëllef?“
- › „Wann ech brav sinn, geschitt dat vläicht net méi.“
- › „Bei deenen anere Kanner ass dat ganz anescht doheem.“
- › „Dat geschitt just a menger Famill.“
- › „Wéi geet et der Mamma an dem Pappa?“
- › „Wat geschitt elo?“
- › „Ech probéieren, mech ofzelenken, mee denken dauernd un dat, wat geschitt ass.“
- › „Wat geschitt mat mir, wa si sech weider schloen a vernennen?“
- › „Muss ech mech elo tëschent der Mamma an dem Pappa entscheeden?“
- › „Wie schützt meng Mamm, wann ech net do sinn?“

Mat all dëse Gedanken am Kapp kann d’Kand keen onbeschwéiert Liewen als Kand liewen, huet Schwierigkeiten, sech an der Schoul ze konzentréieren, gutt nozelauschteren, an nei Saachen ze léieren.

Zousätzlech verënnerlecht d’Kand, datt et selwer net derwäert ass, datt seng Bezuchspersonen him positiv Opmierksamkeet schenken. D’Kand entwéckelt en negatiivt Bild vu sech a senge Kompetenzen.

Kierperreaktiounen

D'Erliewe vu Gewalt ríft ënnerschiddlech Reaktiounen vum Kierper ervir wéi z.B. zitteren, séier ootmen, Uspannung, Bauch- a Kappwéi, Iwwelzegheet, Schweessausbréch, Häerzklappen an/oder méi Sensibilitét fir haart Geräischer a Stëmmen.

D'Kand kann dës Reaktiounen och no der Gewaltsituatioun nach iwwert eng länger Zäit spieren. Si hunn een Afloss op de Schlof (z.B. Albdreem), d'lessverhalten an d'Konzentratioun. Et kann zousätzlech zu Réckschrëtt an der Entwécklung kommen, wéi zum Beispill Bettnässen.

Verhalen

An enger Gewaltsituatioun weist d'Kand, jee no sengen Erfarungen, dräi verschidden automatesch Reaktiounen: fortlafen, agräifen oder erstarren. Dës Noutfall-Reaktiounen kënnen no der Gewaltsituatioun net méi einfach ausgeschalt ginn, an d'Kand probéiert opmierksam ze bleiwen a matzekeréien, wat ronderëm et geschitt, fir an enger änlecher Situatioun schnell reagéieren ze kënnen. Doduerch verhält d'Kand sech onroueg a stellt méiglecherweis vill Froen.

D'Kanner probéieren e Wee ze fannen, fir mat dëser Situatioun ëmzegoen. Verschidde Kanner wëllen net méi aleng sinn an traue sech net méi esou vill zou. Anerer zéie sech zeréck, hunn net méi sou vill Kontakt mat hire Frënn, a wëllen net méi an d'Schoul goen oder un Aktivitéiten deelhuelen. Nach aner Kanner falen duerch en onkontrolléiert, impulsivt oder aggressivt Verhalen op.

Verschidde Kanner sichen d'Gespréich iwwer dat, wat si doheem erliewen, molen, oder spillen d'Gewaltzeenen no. Anere Kanner fält et schwéier, iwwer d'Gewalt doheem ze schwätzen. Dat huet ënnerschiddlech Ursachen:

- › Si hu keng Wieder fir z' erzielen, wat geschitt ass, well hir Sprooch nach net entwéckelt ass.
- › Si krute verbueden, iwwer d'Gewalt doheem ze schwätzen.
- › Si ginn dovun aus, datt Gewalt zum Familljeliewe gehéiert.
- › Si wëllen d'Geheimnisser vun hirer Famill net verroden.
- › Si hunn Angscht virun den ugedrote Konsequenzen (z.B. si géingen an en Heem kommen, Trennung vun der Famill, Strofe fir hir Elteren).
- › Si schumme sech.
- › Si fille sech schëlleg.

Dëst féiert dozou, datt d'Kanner sech aleng spieren. Dëst Gefill gëtt doduerch verstärkt, datt d'Eltere selwer ënner den Auswierkunge vun der Gewalt leiden an doduerch manner disponibel fir hir Kanner sinn.

Ofhängeg vum Alter vun de Kanner beobacht een ënnerschiddlech Bewältegungsstrategien als Versuch, sech un déi Situatioun doheem unzepassen. Bëbeeë kräische méi, loosse sech net sou liicht berouegen, a froe méi no Kierperkontakt. Jugendlecher riskéieren op schiedegent Strategien zeréckzegräifen, fir mat hirem Erliewen, hiren onangeneeme Gefiller, Gedanken a Kierperreaktiounen eens ze ginn (z.B. Konsum vun Alkohol oder Drogen, Schoulschwänzen, Ritzen oder Delinquenz).

Konsequenzen op laang Zäit

D'Erliewe vu Gewalt an der Kandheet kann traumatéisch sinn. Wann d'Kand aleng bleift a keng Hëllef kritt, huet dës laangfristeg Konsequenzen. Symptomer, déi eng Zäit no der Gewalt nach unhalen, weisen drop hin, datt d'Erliefnis net verschafft gouf an eng séilesch Verletzung besteet.



Als traumatéisch gëllt eng Situatioun, bei där ee Mënsch, selwer oder als Zeien, enger grousser Bedroung ausgesat ass. Symptomer, déi no der traumatéischer Situatioun optrieden, si villfälteg an onspezifesch.

Wann dës méi wéi ee Mount unhalen, schwätzt ee vun der posttraumatéischer Belaaschtungsstéierung.

Eng posttraumatéischer Belaaschtungsstéierung weist sech haaptsächlech duerch Reaktiounen wéi:

- › Vermeidung vun allem, wat mat deem Erliefnis zesammenhängt
- › onkontrolléiert an onerwaarten Erënnerungen un d'Erliefnis („Flashbacks“)
- › Uspannung an Nervositéit

D'Entwécklung vun engem gesonde Selbstwäert an d'Gefill vu Sécherheet si beaflosst. Doduerch riskéiert een als Erwuessenen ënner anerem Schwieregkeeten ze hunn, stabil Bezéiungen opzebauen oder oprechtzeerhalen an eng gesond Perséinlechkeet ze entwéckelen. Et besteet de Risiko selwer Gewalt auszeüben oder selwer Affer vu Gewalt ze ginn.

Psychesch Stéierungen, déi heefeg no Gewalterfarungen optrieden, sinn d'Depressioun an déi posttraumatéischer Belaaschtungsstéierung. No traumatéischen Erliefnisser kënnen zousätzlech ënnerschiddlech Symptomer optrieden, déi net de Krittere vun engem spezifesche Stéierungsbild entsprechen (z.B. Schwieregkeeten mam Schlof, kierperlech Symptomer, Stëmmungsschwankungen, ...).



Wat brauch all Kand fir sech gesond ze entwéckelen?⁴

Kierperlech Bedierfnisser



- › Ernährung
- › Schlof
- › Gesondheet
- › Hygiène

Individuell Bedierfnisser



- › Wäertschätzung
- › Luef
- › Feeler maachen dierfen
- › Privatsphär

Sécherheet



- › en Doheem
- › Schutz viru Verletzungen, Krankheet a Geforen
- › Stabilitéit, Uerdnung, Grenzen

Selbstverwierklechung



- › Gefiller weisen
- › Spaass hunn
- › Fräizäit
- › eegen Erfarunge maachen
- › selwer Neies ausprobéieren

Sozial Bedierfnisser



- › Léift, Gebuergenheet, sech gutt opgehewe spieren
- › Sozial Kontakter, Frëndschaften
- › Virbillen
- › d'Recht, d'Mamm an de Papp gär ze hunn

Bildung



- › Reegelméisseg an d'Schoul goen
- › Begleedung um schouleschen a beruffleche Wee

Eng kierperlech a psychesch gesond Entwécklung setzt fir all Kand d'Erfëlle vun dese Bedierfnisser viraus. Bei Kanner, déi Gewalt erliewen, sinn dës Bedierfnisser heefeg net erfëllt. Beim Erliewe vu Gewalt ginn de Kanner hir Grenze verletzt, si fillen sech net a Sécherheet. Eventuell sinn hir Bezuchspersone mat hirem eegenen Erliewe vun der Gewalt beschäftegt, an esou manner disponibel fir d'Bedierfnisser vum Kand.


⁴ Grundbedürfnis-Modell für Kinder und Erwachsene: nach Loose, Graaf & Zarbock, 2013

Wat hëlleft de Kanner?

D’Kanner sinn net verantwortlech fir d’Gewalt doheem. Si brauchen e séchert Doheem, wou déi Erwuesse sech engagéieren, all Form vu Gewalt ze erkennen an ze stoppen. Falls dat net geléngt, ass et wichtig, sech Hëllef ze huelen, zum Beispill bei Frënn, Famill, der Police, oder enger professioneller Berodung fir Affer, Auteur oder béid Parteien. De Wee aus der Gewalt ass net ëmmer einfach. Fir e respektvollen Ëmgang mateneen ze léieren, brauchen d’Kanner Erwuessener als Virbiller. Sou ka verhënnert ginn, datt si spéider selwer Affer oder Auteur vu Gewalt ginn.

D’Erliewe vu Gewalt an hirem Doheem veronséichert d’Kanner. Si verstinn dacks net, wat geschitt. Et hëlleft de Kanner besser ze verstoen, wann en Erwuessene benennt an erkläert, wat lass ass. Besonnesch wichtig ass et datt d’Elteren dorunner schaffen, e gewaltfräit Zesummeliewen ze erméiglechen an de Kanner ze soen, datt Gewalt ni an der Rei ass.

Kanner fille sech heefeg schëlleg fir dat, wat doheem geschitt. Si gesi sech als Ausléiser fir d’Gewalt tèschent hiren Elteren an an der Erzéiung. Si mengen, si misste sech veränneren, fir datt d’Gewalt ophält a luede sech domat vill Verantwortung op. Et hëlleft hinnen ze héieren, datt et net hir Schold ass.



Et ass wichtig, sech Zäit fir d’Kanner ze huelen, an se ze encouragéieren, iwwer hir Suergen ze schwätzen.




Kanner sollen net mat deem, wat si erliewen, aleng bleiwen. Vläicht gëtt et an de Kanner hirem Ëmfeld eng Persoun, zousätzlech zu den Elteren, där se sech uvertraue wëllen, an déi hinnen hëlleft, hir Froen ze beäntweren. Kanner brauchen eng Persoun, déi nolauschtert, freet wéi et hinne geet, an hir Meenung respektéiert.



Am Beräich vun der sexueller Gewalt ass et wichteg, mat de Kanner altersgerecht iwwer hire Kierper an déi sexuell Entwécklung ze schwätzen. Andeems d'Elteren de Kanner hir Grenze respektéieren, liewe si hinne vir, dat jidderee selwer iwwer säi Kierper bestëmmen dierf (z.B. keng Persoun kussen ze mussen, déi een net wëll, bei keen op de Schouss goe mussen). D'Kanner léieren, datt si ‚Nee‘ soen dierfen, falls hinnen eppes net gefält.

Et ass normal, datt Kanner a Situatioune vu Gewalt veronséichert sinn a ganz ënnerschiddlech empfangen a reagéieren. Si brauchen een Erwuessenen, deen hir Reaktiounen an hirt Verhalen versteet a si dora bestärkt, hir Gefiller matzedeelen a se mat de passende Wieder benennt.



All Zort vu Gefiller sinn erlaabt a verännere sech mat der Zäit.

D'Kanner brauche Léift, Ënnerstëtzung a Luef vun hiren Elteren. Si wënsche sech Zäit mat hinnen, fir angeneem Momenter ze verbréngen. Et ass wichtig, datt d'Kanner an hire Stärkten an Interessen ënnerstëtzt ginn (z.B andeem se an engem Veräin oder un enger Aktivitéit deelhuelen) an datt se héieren, datt hir Eltere stolz op se sinn. Dat stäerkt hiert Selbstvertrauen a mécht se méi resilient. Verlässlech Bezuchspersonen (Noperen, Léier- an Erzéierpersonal, Trainer, ...), déi Zäit fir d'Kanner hunn, sinn eng wichtig Ënnerstëtzung fir d'Kanner a kënnen hire Selbstwäert stäerken.

E gereegelten Dagesoflaf am gewinnten Ëmfeld vermëttelt Sécherheet. Spill a Spaass zesumme mat hire Matmënsche lenkt d'Kanner of a schenkt hinne schéi Momenter, déi wichtig sinn, fir hir Entwécklung a Gesondheet.



En deeglecht Owesritual⁵ kann hëllef, den Dag positiv ofzeschléissen a besser ze schlofen.

Froot Ärt Kand: „Wat huet dir haut um Dag besonnesch gutt gefall?“

Maacht dono eng kleng Otemübung fir zur Rou ze kommen:

„Lee dech an d’Bett op de Réck.

Looss de Kapp, d’Äerm an d’Been einfach roueg leien.

Elo kanns du just nach un d’Ootmen denken.

Lee béid Hänn op de Bauch a beobacht, wéi de Bauch sech mam Ootmen op an of beweegt.

Spier, wéi d’Hänn beim Anootmen auserneenginn, a beim Ausootme beieneekommen.

Widderhuel dës Otembewegung 10 mol.“

⁵ Scheidt, I. (2020). 365 Wege zur Achtsamkeit für ein harmonisches Familienleben. Naumann & Göbel

Adresse fir Hëllef

Professionell Hëllef fannt Dir bei spezialiséierte Berodungs- an Hëllefsservicer fir Erwuessener a Kanner. Dir kënnt lech u folgend Adresse bei der Fondation Pro Familia wenden:

ALTERNATIVES

Centre de consultation pour enfants et adolescents victimes de violence

Tel. : 51 72 72-500

Espace Femmes

Centre de consultation

Tel. : 51 72 72-440

Centre de Consultation et de Médiation Familiale

Tél. : 51 72 72-200

infoMann

Centre de consultation
(actTogether asbl)

Tél. : 27 49 65

Helpline Violence domestique (a Collaboratioun mat der FMPO)

Tél. : 2060 1060

www.helpline-violence.lu

www.profamilia.lu

Aner Adresse fir Hëllef an Informatiounen iwuer haislech Gewalt fannt Dir ënner **www.violence.lu** oder bei der Police Grand-Ducale.

Quellenverzeechnis

Bildungsstelle Häusliche Gewalt Luzern. (2013). *Vom Glücksballon in meinem Bauch.* Verlag Mebes & Noack: Köln.

Buchli, R., De Witt-Amrein, C. & Heiniger, F. (2017). *Traumatische Erlebnisse bei Kindern. Diagnostik und Psychoedukation.* Bildungs- und Kulturdirektion Kanton Bern, Amt für Kindergarten, Volksschule und Beratung (AKVB).

Fachstelle für Gleichstellung Stadt Zürich. (2010). *Häusliche Gewalt erkennen und richtig reagieren (2. überarbeitete und erweiterte Auflage).* Verlag Hans Huber: Bern.

Hofer, T. (2016). *Wenn das Vergessen nicht gelingt. Informationsbroschüre zur Post-traumatischen Belastungsstörung.* Schweizerisches Rotes Kreuz.

Kavemann, B. & Kreyszig, U. (2006). *Handbuch Kinder und häusliche Gewalt.* VS Verlag für Sozialwissenschaften: Wiesbaden.

Korritko, A. (2019). *Traumafolgen in der Erziehungsberatung. Richtig erkennen und gezielt helfen.* Beltz Juventa: Weinheim und Basel. Loose, C., Graaf, P., & Zarbock, G. (2013). *Schematherapie mit Kindern und Jugendlichen.* Beltz Verlag: Weinheim.

Klappstein, K. & Kortewille, R. (2020). *Traumatisierte Kinder im Alltag feinfühlig unterstützen. Psychoedukation im Überblick.* Springer Verlag: Wiesbaden.

Seyfried, D. & Winkler, R. (2008). *Ein Tag in Pauls Familie. Arbeitsmaterial für kindliche Zeugen von häuslicher Gewalt.* Dgvt Verlag: Tübingen.

Weinberg, D. (2020). *Verletzte Kinderseele. Was Eltern traumatisierter Kinder wissen müssen und wie sie richtig reagieren.* Klett-Cotta: Stuttgart.

Weiß, W. (2016). *Philipp sucht sein Ich. Zum pädagogischen Umgang mit Traumata in den Erziehungshilfen.* Beltz Juventa: Weinheim und Basel.

Inhalte **Textgestaltung** ALTERNATIVES – Centre de consultation pour enfants et adolescents victimes de violence (Catherine Capelle a Nadine Steichen)

Relecture Béatrice Ruppert a Pierrette Meisch (Fondation Pro Familia) | Françoise Peters | Dr. Katy Seil-Moreels an Dr. Michèle Kayser | Christopher Witry an Isabelle Schroeder, Ministère fir Gläichstellung tëschent Fraen a Männer

Design accentaigu



www.profamilia.lu